

Carta ivi nacahyí Pablo nuú Timoteo

Chíndahá Pablo Ndióxi coo Timoteo

¹ Yehe cúu Pablo ta cúu u da apóstol, da cája chúun cuéntá Jesucristo. Nacaxi Ndióxi yehe ta nachindahá mé á yehe caxi tuhun i tuhun vaha sahá Jesucristo nuú ñayivi. Jári nasahan Ndióxi tuhun a nuú ñayivi ña cán quéa tá cándéé ini na mé á já quéa cuhun na coo na xihin mé á anda ama cáa quivi. ² Cahyi i carta yóho nu mún, Timoteo jáchi cúun tátuhun jahyi mí i ta quíhvi ndivaha ini i yohó. Ná caja cuaha Ndióxi, tátá yo xihín Jesucristo, xitoho í ñamaní xuhun ta ná tahnda ini a sahun ta ná caja mé á ña ná coo vaha inún.

Jácahan Pablo Timoteo ña ná ndicani da nuú ñayivi sahá Jesucristo

³ Ndíquiahva i ndixahvi nu Ndióxi saha mún, Timoteo jáchi ndícuahun ini i yohó tá xíca tahví i nu Ndióxi ñuú ta ndiví. Cája chúun vaha i cuéntá mé á tátuhun nacaja chúun tásahnu jícó i sanahá. Ta xíni ña íin vaha ínima i nu Ndióxi. ⁴ Ndícuahun ini i ndaja nasacu ndivahún ta natahnda inún sahá i tá naquee e cán vaxi i yóho. Jári yehe va cuni ndivaha i cuni tucu u yohó já ná chutú ndaa ini i xihin ña cáji ndivaha ini i. ⁵ Ndíquiahva i ndixahvi nu Ndióxi tá ndícuahun ini i ña mé a ndaa cándéé inún Jesucristo. Nu cuítí nacandéé cáhnu ini ná chéhun, Loida xihin nánún, Eunice Jesucristo ta quiahva já xíni vaha i ña cándéé cáhnu inún mé á.

⁶ Ña cán quéa jácahan i yohó ña ná ndicuhun inún caja chúun chágun xihín ña ñañehe táhvun nu Ndióxi tá nachinúu i ndahá i jinun. ⁷ Jáchi co cúní Ndióxi ña ná cayihví yo. Já quéa nasahan ínima yíi á nu yo já ná nduu ndeé iní ta ná quihví ini táhan í ta ná cahnu yo mí cañehe vaha í quiahva xihín á. ⁸ A cácahan toho nuun cahun tuhun vaha sahá Jesucristo, xitoho í. Ta a cácahan nuun saha mí i vatí ndácaan i vecaa sahá Jesucristo. Joo ña ndítahan cajún quéa quiahva ndeé inún tá ná ndoho inún sahá Jesucristo jáchi sahan Ndióxi ndeé mé á nuun. ⁹ Najácaacu Ndióxi mí ta naçaxi a mí ña ná cacuu ñayivi yíi cuénta mé á. Ta a juú sahá ña naçaja vaha í joo naçaxi a mí jáchi nasacu ini a caja ñamaní xoho anda tá camaní cava sahá saha ñuyíví. Sahá ña cán quéa nachindahá a Jesucristo quivi a sahá cuachí. ¹⁰ Ta anda viti naxinu coo ña nasacu ini a jáchi naquixi Jesucristo ñuyíví yoho ta naxihí a ndica crúxu. Ta sahá ña naçaja mé á co ndítahan yihví yo quiví jáchi cuhun í coo í xihín mé á anda ama caa quiví tá ná candeé iní tuhun vaha cáhan sahá Jesucristo.

¹¹ Naçaxi Ndióxi yehe ná cacuu u in apóstol cuénta mé á ña ná jánaña i tuhun vaha sahá Jesús nuú ñayivi, na coo naquixi chichi Israel. ¹² Ta vatí ndóho ini i sahá ña yoho joo co cácahan toho nuú i jáchi xini vaha i yo cúu Jesucristo, mé a candeé ini i. Nandiquiahva i mí i ndáña mé á ta xini vaha i ña candaa mé á yehe anda quiahva ná tandaa quiví quixi tucu a ñuyíví yoho.

¹³ Ta jácahan i yohó ña ná candico cáhnún íchi ndaa, ña najánaña i nuun. A jándicoún ña candeé

inún Jesucristo ta a jándicoún ña quíhvi inún ñayivi jáchi in nanduú xihín Jesucristo sahá ña cándeé iní mé á. ¹⁴ Sahá ña ndácaan ínimá yíi Ndióxi ini in in yó ta sahá ña chíndeé a mí sahá ña cán quéa xíní ñúhú cacu vahún ña nasahan Ndióxi nuun.

¹⁵ Sa xíní vahún ña najándicoo tóco ndihi na cúu cuéntá Jesús ndúu estado Asia yehe. Tañu mé na cán ndácaan Figelo xihín Hermógenes. ¹⁶ Cúni ña ná tahvi ini Ndióxi sahá Onesíforo xihín na vehe da jáchi cuahá tañu nachindeé da yehe ta já nandivaha ini i. Ta coó nacacahan nuu da sahá ña ndácaan i vecaa. ¹⁷ Ña nacaja da quéa nandinducú da yehe tá nasaa da ñuu Roma yóho ta coó nandiquehe ndée dá anda quiahva nandiñehe dá yehe. ¹⁸ Ná tahvi ini Ndióxi sahá da cán tá ná ndindaa quiví quixi tucu Jesucristo ñuyiví yóho. Ta sa xíní vahún ña nachindeé da yehe tá nasahin i ñuu Efeso.

2

Ná quiahva ndeé iní tá ndóho iní sahá Jesucristo

¹ Ta mún, Timoteo cúun tátuhun jahyi mí i ña cán quéa jácahan i yohó ña ná coo ndacú inún xihín ndée ña nasahan Jesucristo nuun. ² Sa xíní johún tuhun vaha nacaxi tuhun i nuú cuahá ñayivi. Ta viti ndítahan nu mún jánahún ña cán nuú java ñayivi, na cúu ñayivi ndísáhnú ini já ná cúu jánaña ná ña nuú java ga ñayivi.

³ Quiahva ndeé inún tá ndóho inún sahá Jesucristo jáchi cúun tátuhun in soldado vaha cuéntá mé á. ⁴ Jáchi in soldado cája cuití da ña sáhdá jefe da nu dá ta co cája da inga ga ñaha jáchi cúni

da ña ná tahan ini jefe da sahá ña cája da. Tá quiahva cája mé soldado yóho quiahva já ndítahan nu yo caja í. ⁵ Jári sa xíni vaha ndó ndaja cája da sájíquí pelota. Tá co sájíquí vii da já quea a cuú quee vaha da. Quiahva já cuú á xihín mí jáchi tá co cája í ña cúní Ndióxi já quea a cuú quee vaha í. ⁶ Tá ndíhi ini in da xútu já quea ndítahan nu dá jáquee da nu cuítí ñaha na xutu da. Ta quiahva já ndítahan ndíhi iní caja chúun í cuéntá Jesucristo já quea cuu ndiquehé ña quiahva Ndióxi nu yo. ⁷ Ndicani vaha inún saha tóco ndihi ña naçahan i xuhun ta já chindeé Ndióxi yohó candaa vaha inún tóco ndihi ña cáchí i xuhun.

⁸ Xíni ñúhú ndicuhun inún Jesucristo, mé á naquixi chichi David. Najánditacu Ndióxi mé á tá naxihí a. Ta viti cáxi tuhun i tuhun vaha saha mé á nuú ñayivi. ⁹ Ta ndóho ndivaha ini i sahá tuhun cáhan i nuú ñayivi. Naçató na yehe xihín cadena ta nachicaan na yehe vecaa tá quiahva cája na xihín in da quini. Joo a cuú caja na ña yóho xihín tuhun Ndióxi jáchi cuaha chága ñayivi cáhan na sahá Jesús viti. ¹⁰ Ña cán quea ín tiaha i ndoho ini i sahá ñayivi, na naçaxi Ndióxi cacuu na cuéntá mé á. Jáchi cúní Jesucristo jácacu a ndihi na cándéé ini mé á já ná coo na xihín mé á anda ama cáa quivi. Ta ñúchí ndivaha cán. ¹¹ Ña cáchí mé ña yóho cuú á ña ndaa:

Tá ná quiví sahá Jesucristo já quea cuu canduú xihín mé á anda ama cáa quivi.

¹² Tá ná caja ndeé iní ña ndóho iní sahá Jesucristo já quea vaxi quivi cahnda í chuun xihín mé á.

Tá ná cachí ña cō cúu yō cuéntá Jesucristo já quéa cachi mé á ña cō xíní toho a mí.

13 Vatí ná ndindójó yō sahá Jesucristo joo a ndindójó toho mé á saha yō, jáchi mé a ndaa jáxinu cōo mé á tuhun sahan nu yó caja.

Táhán ini Ndióxi xihín da cája chúun vaha cuéntá mé á

14 Ña yóho ndítahan jándicuhun inún ñayivi. Cah-ndún chuun nu ná ña ná a cáni táhan yúhu ná saha ndá tuhun cúu ña vaha chága jáchi cōó saha cúu á. Joo ña cája na cán quéa játiví na xíní túni mé ñayivi xíní jōho ña cán. 15 Ndinuhu inún caja chúun vahún cuéntá Ndióxi já ná tahan ini mé á xuhun. Tá ná cajún ña yóho já quéa a cáchan nuun jáchi ndinuhu ña ndaa najánahún nuú ñayivi. 16 A quíhvi nuún nditúhún xihín ñayivi tá nditúhún quíhvi na jáchi quéta nuu chága na tañu cuachi tá nditúhún quíhvi na. 17 Ta java tañu ña cáhan xihín táhan na jan jándihíhvi a ñani táhan na jáchi tá quiahva jándihi cuehe táhyi sahá yiquí cuñu ñayivi quiahva já jándihi tuhun cáhan na sahá ñayivi. Já nandoho Himeneo xihín Fileto. 18 Naçaxoo ndíví da nu íchi ña ndaa ta viti jánahá da ña tuhún jáchi cáchí da ña sa nayaha va quiví tá nditacu tucu na sa naxihí. Jájana da jiní java ñayivi ña ná a cándéé ga ini na Jesús. 19 Joo Ndióxi cáhan ña ndaa ta a cuú ndijama mé á ña naçahan. Ta já cáchí tuhun Ndióxi sahá ñayivi cuéntá mé á: “Xíní Ndióxi ndá na cúu na cuéntá mé á.” Já cáchí tucu tuhun Ndióxi já: “Tá ná cachi ñayivi ña cándéé ini na Jesucristo, xitoho na

já queá ndítahan nu ná jándicoo na cuachi cája na”, cáchí tuhun Ndióxi.

²⁰ Ta viti ná cacu u in quiahva nuun: ini in vehe cáhnu ín ñaha jiuhun cuáán xihín ñaha jiuhun cúxú. Jári ñúhu ri ñaha nacavaha xihín yító ta ñúhu ri ñaha nacavaha xihín ndahyi. Ta java ña cán ín javí a ta java ña cán ín chuun a ndijáá ní quivi. ²¹ Tá najándicoo í cuachi cája í já queá cacuú ñayivi víi nu Ndióxi. Ta cacuú tátuhun in cohó vaha jáchi cuu caja chúun í cuéntá Ndióxi ta já cuu coo tiahva í caja í tóco ndihi ña vaha.

²² Cama chá caxoún nuú cuachi ña ndiáva ini da tacú caja da. Ta candico cáhnún íchi cuéntá ña ndaa ta candeé inún Ndióxi ta quihvi inún ñayivi ta coo vaha inún xihin ná. Tá ná cajún ña yóho in cacuún xihin tóco ndihi na cúu cuéntá Jesús, na ín víi ínima nu Ndióxi jáchi xíca na nu Ndióxi ña ná chindeé a na. ²³ A quihvi nuún nditúhún quihvún xihín ñayivi jáchi tá ná cajún ña yóho já queá vaxi quivi tá casáhá cani táhan na xuhun. ²⁴ Ta ndá da ndico íchi cuéntá Jesús co ndítahan nu dá nducú da cuachi xihín ñayivi. Ña ndítahan caja da queá caja vaha da xihin tóco ndihi ñayivi ta ná cacuu da in da tiahva jánahá vaha ñayivi ta ná coo cáhnu ini da xihin ná. ²⁵ Ta co ndítahan nu dá ndiñehe jícó da mé dá nani jánahá da nuú ñayivi, na sáá ini xihin tuhun Ndióxi jáchi tiahva náá caja Ndióxi ña ná ndicó coo ini na ta já candaá ini na ña ndaa sahá Jesucristo. ²⁶ Jáchi tá ná ndicó coo ini na já queá jani ná ndáhá tiñáhá sacuahá jáchi nasacomí mé rí cuéntá saha ná ña ná caja na ña cúní mé rí.

3

Ña tandaa caja ñayivi tá jalóho cúni ndihi sahá ñuyívi

¹ Ta ndítahan candaá vaha inún, Timoteo ña tá ná cayati quívi quixi tucu Jesucristo ñuyívi yóho já queá ndoho ndivaha ini na cúu cuéntá Jesús. ² Jáchi vaxi quívi tá caja ñayivi cuahá ndivaha cuachi. Cuahá ñayivi cajíhnda ná ta quíhvi ndivaha ini na jiuhún na. Ta já caja cáhnu na mé ná ta ichi ndivaha coo ini na ta candají na Ndióxi ta a cúni johó na nuú cahan tátá náná na xihín ná. Ta ni ndixahvi a ndíquiahva na nu Ndióxi ta ni a cája cáhnu na mé á. ³ Ta a quíhvi ini táhan na ta ni a cája cáhnu ini sahá táhan na. Ta cahan jíquí na saha java ga ñayivi ta catuhún na. Ta a cuú cahnu na nuú ña xíca ini na caja na. Xíxi coo ini na xihín ñayivi ta candají na tóco ndihi ña vaha. ⁴ Jicó túhún táhan na. Ta cacuu na ñayivi cama jini. Ta caja ichi ndivaha ini na. Catóo chága na cáji ini na xihín ñaha ñuyívi yóho a juú ga xihín ñaha Ndióxi. ⁵ Ta caja na tá quiahva cája na cúu cuéntá Ndióxi joo chijehé tuhun na saha Ndióxi, mé á sahan ndée nu ná caja na ña cúni mé á.

Caxoún nuú ndihi na cája cuachi yóho. ⁶ Jáchi tañu na jan ndúu java ñayivi, na quíhvi vehe tá vehe jándahvi na najihí quíhvi xihín ña jána na. Ta mé najihí yóho ndójo cuahá ndivaha na cuachi jáchi nayaha quiahva cája na tá nuú ña núu xíca ini na caja na. ⁷ Ta mé najihí yóho jácuaha ta jácuaha na joo co xínu coo nu ná candaá ini na ña ndaa. ⁸ Sañahá ndivaha nasanduu ivi da tají. In da naní da Janes ta inga da naní da Jambres. Tá quiahva

na_saji nuu da cán nuú Moisés quiahva já sáji nuu java ñayivi nuú ña ndaa viti. Ña núu ndacaan xíní túni na ta coó naxeen na candeé ini na Jesucristo. ⁹ Joo vaxi quivi tá a cúu ga jándahvi na ñayivi jáchi mé quivi cán candaá cáxí ini ñayivi ndaja tóntó na_caja na cán. Já nandoho Janes xihín Jambres sanahá jáchi nacandaá cáxí ini ñayivi ña na_caja núu da xihín Moisés.

Sáhdá tucu Pablo chuun nuú Timoteo

¹⁰ Joo sa xíní vahún tá quiahva na_caja i tá najánaha i nuun. Ta sa xínun ña cája i catacu u xihín ña nasacu ini i caja i chága chí nuu. Ta sa xínun ndaja candeé ini i Jesús. Ta sa mé quiahva já xíní vahún ña co xójo ini i xihín ñayivi. Ta sa xíní vahún ña quíhvi ini i tóco ndihi ñayivi. Ta xínun ndaja nasahan ndeé ini i ¹¹ tá na_caja xíxi na xihín i ta ndaja najándoho na ini i tá nasahin i ñuu Antioquía xihín ñuu Iconio xihín ñuu Listra. Joo nachindeé Ndióxi yehe ta natavá mé á yehe nu tóco ndihi ña nandoho i. ¹² Ta mé a ndaa ndoho tá ndoho ini ñayivi tá cúni na candico cáhnu na íchi cuéntá Jesús. ¹³ Ta ñayivi quini, mé na jándahvi ñayivi cája chága ví na cuachi ta co xíní na ndájá xinu coo nuú ndihi cuachi cája na. Xíca na jándahvi na ñayivi ta janda mé na cán najándahvi ñayivi.

¹⁴ Joo jácahan i yohó, Timoteo ña ná a jándicoún ña ndaa, ña nacatiahvún tá najácuahún xihín nde jáchi xíní vahún ña cúu á ña ndaa. Ta sa xíní vahún ndá ñayivi cúu nde. ¹⁵ Ta candaá vaha inún tuhun Ndióxi jáchi anda tá lohún najácuahún ña. Ta mé tuhun Ndióxi cuu jánaha yohó cajún ña cúni mé á ta cuu jácacu a yohó jáchi candeé inún Jesucristo.

16 Nacahyí ñayivi tóco ndihi tuhun Ndióxi yóho jáchi najácahan Ndióxi ínima ná ña ná caja na ña. Ta mé tuhun Ndióxi yóho chindeé a mí jáchi jánaḥa mí caja í ña cúní Ndióxi ta jánani ri a mé ví tá co cája vaha í. Ta jándicaca vaha mí tá co xíca vaha í íchi cuéntá Ndióxi. Ta sa mé quiahva já jánaḥa mí ña ná cacuú ñayivi ndaa, na co cája cuachi. 17 Já quéa ná cuu nduu ndacú chága ini na cándeé ini Ndióxi xihín tuhun mé á ta xihín ña yóho cuu coo tiaḥva na caja na tá nuú ña vaha.

4

1 Vaxi quivi quixi tucu Jesucristo ñuyiví yóho cacomí a cuéntá sahá yo ta mé já caja víi a sahá na tácu xihín sahá na sa naxihi. Sahá ña cán quéa nu Ndióxi xihín nuú Jesucristo, xitoho í sáhdá i chuun nu mún, Timoteo 2 ña ná coo tiaḥvún caḥun tuhun Ndióxi nuú ñayivi ní tiempo tá núná nuún á tá coó. Ta ndítahan nuun cavún jiní na cája cuachi ta jácahún na ña ná caja na ña cúní Ndióxi. Ta ndítahan quiahvún tuhun ndeé ini na. Ta víi víi jánaḥún tuhun Ndióxi nu ná ní tiempo. 3 Jáchi vaxi quivi tá a cándusa ga ñayivi cuni johó na tuhun ña ndaa. Joo ndihi ini na nducú cuahá na maestro, da jánaḥa ña xíca ini mé ná taa johó na. 4 Ta a cándusa na taa johó na ña ndaa jáchi cáji chága ini na taa johó na ña tuhún cuéntá ñayivi ñuyiví. 5 Sahá ña cán quéa sáhdá i chuun nu mún, Timoteo ña ná cañehe vahún quiahva xihín ña cajún. Ta quiahva ndeé inún tá ná ndoho inún. Caxi tuhún tuhun vaha sahá Jesús nuú ñayivi xihín ndinuhu inún. Ta xíní ñúhú jáxinu coún tóco ndihi chuun nasahan Ndióxi nuun cajún.

⁶ Sa ín tiahva i joco i mí i nu Ndióxi. Sa xini vi ña sa nacayati quivi quivi vi. ⁷ Nacaja chúun vaha i cuénta Ndióxi tátuhun cája chúun vaha in soldado nu jefe da. Najáxinu coo ndihi i chuun nasahan Ndióxi nuú i tátuhun cája in da xínu tá sa naquee vaha da. Ta nandico cáhnu i íchi ña cándéé ini i Jesús. ⁸ Ta viti ndáti i casaa quivi caja vii Jesucristo, xitoho í saha tóco ndihi ñayivi. Mé tiempo cán ndiquehe e ña quiahva mé á nuú i sahá ña nacaja i ña ndaa. Ta quiahva já caja Jesucristo, mé á cúu ña ndaa xihín java ga ñayivi, mé na cájii ini ndáti na casaa quivi quixi tucu a ñuyívi.

Cáhan Pablo cuénta mé da viti

⁹ Ndihi inún quixi camún coto nihnún yehe. ¹⁰ Najándicoo Demas yehe jáchi nacatóo chága da ñaha ñuyívi yóho ta cuahan da ñuu Tesalónica viti. Ta naquee Crescente cuahan da estado Galacia ta já naquee Tito cuahan da chí estado Dalmacia. ¹¹ In túhún Lucas ín da xihín i. Ndinducún Marcos ná quixi da xuhun tá ná quisún yóho jáchi cuu chindeé vaha da yehe xihín chuun cája i yóho. ¹² Sa nachindahá i Tiquico ñuu Efeso. ¹³ Tá ná quisún yóho cajún ñamaní cañehún cotó ndeé e ña najándicoo i ñuu Troas vehe Carpo. Ta jári libro va cañehún ña quisún yóho. Ta a ndíndójún cañehún ní quíti ña nacyhyí i nuun.

¹⁴ Á co ndícuhun inún Alejandro, da cája chúun cáni caa. Cuahá ndivaha ña núu nacaja da xihín i joo vaxi quivi tá chahvi da sahá, caja Jesucristo, xitoho í. ¹⁵ Cuénta coún xihín dá jáchi cándají ndivaha da tuhun Ndióxi, ña jánaha yó nuú ñayivi.

¹⁶ Tá nandiquehe e sahá i nu cuítí nuú na jutixia ni in ñayivi coó nachindeé yehe. Tóco ndihi na najándicoo na yehe. Ná caja cáhnu ini Ndióxi sahá ña naçaja na cán. ¹⁷ Joo Ndióxi quea nachindeé a yehe ta nasahan ndée á nuú i ña ná cuu çaxi tuhun i tuhun vaha sahá Jesús ná cuni johó tóco ndihi na coó naquixi chichi Israel. Tá nachindeé Ndióxi yehe já cúú á tátuhun naçacu yehe yuhú león. ¹⁸ Ta cándéé ini i ña jáçacu a yehe nuú ndihi ña núu. Ta candaa vaha Ndióxi yehe anda quivi çuhun i indivi coo i xihin mé á nu cahnda Ndióxi chuun anda ama cáa quivi. Cóho caja cáhnu í mé á anda ama cáa quivi. Já ná coo.

Ndíndayí Pablo na cúú cuéntá Jesús

¹⁹ Chindahá i Ndióxi coo Prisca xihin Aquila xihin na vehe Onesíforo. ²⁰ Naçandoo Erasto ñuu Corinto. Ta naçandoo Trófimo ñuu Mileto jáchi quíhvi da. ²¹ Ndihi inún quisún yóho tá cámaní xinu coo tiempo vixi. Eubulo xihin Pudente xihin Lino xihin Claudia chindahá na Ndióxi coún. Ta jári ndihi na cúú cuéntá Jesús ñuu yóho chindahá na Ndióxi coún.

²² Ná coo Jesucristo, xitoho í xuhun. Ná caja Ndióxi cuahá ñamaní xihin ndihi ndó.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

7f2d3ecf-6d15-55a5-9081-6e970474df2f